



GIG
CYMRU
NHS
WALES

Iechyd Cyhoeddus
Cymru
Public Health
Wales

**Cofnodion heb eu cadarnhau o Gyfarfod y Bwrdd
a gynhaliwyd ar 27 Mai 2021,
(yn electronig drwy Microsoft Teams ac wedi'i ffrydio'n fyw
ar y we)**

Yn bresennol:		
Jan Williams	(JW)	Cadeirydd
Tracey Cooper	(TC)	Prif Weithredwr
Jyoti Atri	(JA)	Cyfarwyddwr Gweithredol Dros Dro Iechyd a Llesiant
Diane Crone	(DC)	Cyfarwyddwr Anweithredol (Prifysgol)
Eleri Davies	(ED)	Cyfarwyddwr Meddygol Dros Dro
Kate Eden	(KE)	Cyfarwyddwr Anweithredol, Dirprwy Gadeirydd a Chadeirydd y Pwyllgor Ansawdd, Diogelwch a Gwella
Dyfed Edwards	(DE)	Cyfarwyddwr Anweithredol a Chadeirydd y Pwyllgor Archwilio a Llywodraethu Corfforaethol
Huw George	(HG)	Dirprwy Brif Weithredwr a Chyfarwyddwr Gweithredol Gweithrediadau a Chyllid
Sian Griffiths	(SG)	Cyfarwyddwr Anweithredol (Iechyd Cyhoeddus)
Mohammed Mehmet	(MM)	Cyfarwyddwr Anweithredol (Awdurdod Lleol)
Andrew Jones		Cyfarwyddwr Gweithredol Dros Dro Gwasanaethau Iechyd y Cyhoedd
Judi Rhys	(JR)	Cyfarwyddwr Anweithredol (Trydydd Sector)
Rhiannon Beaumont-Wood	(RB-W)	Cyfarwyddwr Gweithredol Ansawdd, Nyrsio a Gweithwyr Proffesiynol Perthynol i Iechyd
Hefyd yn Bresennol:		
Mark Bellis	(MB)	Cyfarwyddwr Polisi ac Iechyd Rhyngwladol, Canolfan Gydweithredol WHO ar gyfer Buddsoddi mewn Iechyd a Llesiant
John Boulton	(JB)	Cyfarwyddwr Gwella Ansawdd a Diogelwch Cleifion y GIG/Cyfarwyddwr Gwelliant Cymru
Liz Blayney	(LB)	Dirprwy Ysgrifennydd y Bwrdd a Rheolwr Llywodraethu'r Bwrdd

Helen Bushell	(HB)	Ysgrifennydd y Bwrdd a Phennaeth Uned Fusnes y Bwrdd
Paul Daulton	(PD)	Pennaeth Archwilio Mewnol
Mariana Dyakova	(MD)	Canolfan Gydweithredol WHO ar Fuddsoddi ar gyfer Iechyd a Llesiant (ar gyfer eitem 3 yn unig)
Neil Lewis	(NL)	Cyfarwyddwr Dros Dro Datblygu Sefydliadol a Phobl
Jamie Topp	(JT)	Golygydd Digidol
Verity Winn	(VW)	Arweinydd Archwilio (Perfformiad), Archwilio Cymru
Ymddiheuriadau:		
Stephanie Wilkins	(SW)	Cynrychiolydd o'r Fforwm Partneriaeth Staff

Dechreuodd y cyfarfod am 10.00am

PHW 247/2021	Croeso ac Ymddiheuriadau
Croesawodd JW bawb i'r cyfarfod, gan nodi bod dolen ffrydio byw ar gael ar y wefan; estynnodd groeso arbennig i'r rhai a oedd yn arsylwi'r cyfarfod ar-lein. Rhoddodd JW grynodedb o rôl y Bwrdd fel Corff Llywodraethu'r sefydliad, gyda chyfrifoldebau penodol am: bennu cyfeiriad strategol; creu a chynnal partneriaethau strategol; pennu archwaeth risg a goruchwylio risgiau strategol; craffu ar gyflawni yn ystod y flwyddyn yn erbyn cynlluniau a phennu naws a diwylliant. Roedd y Bwrdd yn ymrwymedig i sicrhau y gallai pob aelod o staff ddod i'r gwaith a bod yn nhw eu hunain, heb ofn anfantais neu wahaniaethu o unrhyw fath. Dywedodd JW fod y Bwrdd yn cynnal ei gyfarfodydd yn unol â rheolau Ymddygiad ffurfiol wrth gynnal busnes, a bod manylion y rhain ar gael ar y wefan: https://phw.nhs.wales/about-us/board-and-executive-team/board-etiquette/ Roedd y Bwrdd yn cynnal ei gyfarfodydd ar y sail bod yr aelodau wedi darllen yr holl bapurau ymlaen llawn, gan wneud y defnydd gorau o'r amser a oedd ar gael ar gyfer trafodaeth. Rhoddodd JW grynodedb o'r eitemau ar yr agenda, gan nodi bod y Bwrdd wedi canolbwyntio y llynedd ar faterion COVID-19, ond y gallai'r aelodau ddechrau dychwelyd yn awr i rôl pennu cyfeiriad strategol y Bwrdd ar gyfer y dyfodol. Nododd y Bwrdd yr ymddiheuriadau am absenoldeb.	

PHW 248/2021**Datgan Buddiannau**

Ni wnaeth aelodau'r Bwrdd ddatgan unrhyw fuddiannau yn ychwanegol at y rhai sydd eisoes wedi'u cofnodi ar y Gofrestr Datganiadau o Fuddiannau.

PHW 249/2021**Cyfeiriad Strategol – WHESRi
(cyflwyniad)**

Croesawyd MD i'r cyfarfod gan JW i drafod [*Gosod Tegwch Iechyd wrth Wraidd Ymateb ac Adferiad Cynaliadwy COVID-19: Adeiladu Bywydau Llewyrchus i Bawb yng Nghymru. Menter Adroddiad Statws Tegwch Iechyd Cymru \(WHESRi\)*](#), a ysgrifennwyd ar y cyd gan MB a MA.

Wrth gyflwyno'r adroddiad, atgoffodd MB y Bwrdd mai Cymru oedd y wlad gyntaf i ddefnyddio menter carreg filltir, Adroddiad Statws Cydraddoldeb Iechyd (HESRi) Ewropeaidd Sefydliad Iechyd y Byd (WHO), gan leoli ei hun fel dylanwadwr Byd-eang a safle arloesedd byw. Rhoddodd grynoded o'r Memorandwm Cyd-ddealltwriaeth rhwng Swyddfa Ranbarthol Ewrop WHO a Llywodraeth Cymru; roedd hyn wedi hwyluso'r broses o gynhyrchu'r WHESRi.

Yna gwnaeth MD [*gyflwyniad ar ffurf sleidiau*](#) i'r Bwrdd a oedd yn crynhoi'r gwaith arloesol sy'n cael ei wneud. Roedd adroddiad cyntaf WHESRi yn rhoi sylw canolog i gydraddoldeb iechyd yn yr ymateb i COVID-19 a'r adferiad ohono: creu bywydau ffyniannus i bawb yng Nghymru. Aeth MD ymlaen i amlinellu'r fethodoleg a ddefnyddiwyd; roedd hyn wedi crynhoi tystiolaeth o'r holl ffyrdd yr oedd COVID-19 wedi effeithio ar y boblogaeth. Darparodd rai enghreifftiau o ddata, wedi'i osod mewn cyd-destun Byd-eang, ac yna cymhwysodd hyn i Gymru. Roedd y cyflwyniad yn amlinellu'r heriau a'r cyfleoedd sydd wedi deillio o'r pandemig, a chrynhwyd y negeseuon allweddol fel a ganlyn:

- Roedd COVID-19 wedi dwysáu anghydraddoldebau a oedd yn bodoli eisoes ac roedd wedi amlygu gwendidau newydd.
- Roedd wedi cael yr effaith fwyaf ar y rhai a oedd yn byw mewn tloedi, y rhai a swyddi incwm isel, ar bobl ifanc, y digartref a phobl ag anableddau;
- Roedd cyfle yn awr i adfer a datblygu proses adfer gynaliadwy a theg ar ôl y pandemig. Ni fyddai dychwelyd i'r *status quo* yn ddigon er mwyn mynd i'r afael ag etifeddiaeth sylfaenol COVID-19. Roedd cyfle yn bodoli i gydweithio i ddatblygu poblogaethau mwy cadarn yn y dyfodol.

Nododd Adroddiad WHESRi 70 a mwy o adroddiadau a pholisïau yn y DU a oedd yn darparu tystiolaeth helaeth o alluogwyr a chydraddolwyr; roedd y rhain yn cynnwys: addysg a thechnoleg ddigidol; cyfleoedd i wahanol genedlaethau; a ffyrdd amrywiol o weithio.

Diolchodd JW i MD a MB am eu cyflwyniad rhagorol ar y gwaith arloesol hwn ac estynnodd wahoddiad i'r aelodau gyflwyno unrhyw sylwadau neu gwestiynau:-

- Llongyfarchodd SG MB a MD am ddatblygu'r fenter Fyd-eang gyffrous hon. Roedd yn cyflwyno gwerth da nid yn unig i Gymru ond i rannau eraill o'r byd hefyd. Un o effeithiau cadarnhaol COVID-19 oedd y ffocws canlyniadol ar y bwlch tlodi/anghydraddoldeb. Gofynnodd SG sut y byddai Iechyd Cyhoeddus Cymru yn ymgorffori'r canfyddiadau yn eu gwaith a'r trefniadau ar gyfer monitro cynnydd.

Soniodd MB am nodi set ddata eang a allai ategu dangosfwrdd i ddangos y cydberthnasoedd; dywedodd MD fod nifer o ddangosfyrddau ar waith eisoes ac, ar ôl eu mireinio, gallent ddarparu data ar gyfer Cymru ac er mwyn gwneud cymariaethau rhyngwladol.

- Llongyfarchodd MM y tîm ar ei waith hefyd a nododd fod y negeseuon llwm ynghylch pobl ifanc, a'u hofnau am eu rhagolygon cyflogaeth, ffordd o fyw a'u dyfodol economaidd; gofynnodd a oedd unrhyw dystiolaeth i awgrymu bod y sefyllfa'n gwella wrth i'r wlad symud allan o'r pandemig.

Ailadroddodd MB effaith arwyddocaol y pandemig ar bobl ifanc; roedd y data yn dangos rhai gwelliannau i'r sefyllfa wrth i'r cyfyngiadau symud lacio, ond rhybuddiodd nad oedd rhai agweddau pwysig ar yr effaith, gan gynnwys bylchau yn y dewisiadau addysg a chyflogaeth, i'w gweld eto yn y data; yn wir, gallai'r materion hyn waethygu'r sefyllfa.

- Diolchodd KE i'r ddau awdur am y gwaith cyffrous a thrawsnewidiol. Roedd ei chwestiwn yn gysylltiedig â'r gofyniad i adfer ac ailadeiladu'r GIG ar fyrder, a bod perygl cynhenid y gallai hyn arwain at ddychwelyd i'r ffyrdd o weithio cyn Covid-19. Gallai hyn ddwysáu anghydraddoldebau presennol a holodd KE ynghylch capasiti'r timau iechyd cyhoeddus lleol i helpu i ymgorffori newid yn y dull gweithredu.

Cytunodd MB ar yr angen i osgoi dychwelyd i'r status quo ac esboniodd y gofynion ar gyfer gwneud hyn. Roedd y rhain yn cynnwys timau iechyd cyhoeddus lleol yn pwysleisio pwysigrwydd ffocws ar iechyd y boblogaeth ar draws pob maes cynllunio a darparu gwasanaethau.

- Croesawodd DE y cyflwyniad rhagorol a rhoddodd sylwadau ar effaith ddiarnheul COVID-19 ar anghydraddoldebau presennol. Holodd ynghylch gweithredu canfyddiadau adroddiad WHESRi.

Nododd TC, o ystyried y newidiadau parhaus sy'n gysylltiedig â'r pandemig, fod yr adnoddau a oedd gan y sefydliad i ddatblygu'r gwaith ehangach ar y niweidiau yn y dyfodol agos yn brin. Byddai ail hanner y flwyddyn yn gweld gwelliannau i'r sefyllfa a dywedodd y byddai'n darparu gwybodaeth reolaidd i'r Bwrdd am hyn. Roedd canfyddiadau adroddiad WHESRi yn bwysig i'r llywodraeth ac i bob corff cyhoeddus ar hyd a lled Cymru; byddai Iechyd Cyhoeddus Cymru yn nodi adnoddau ychwanegol er mwyn datblygu'r agenda cyn gynted ag y byddai amgylchiadau'n caniatáu hynny.

I gloi'r drafodaeth ar yr eitem hon, dywedodd JW mai dechrau sgwrs y Bwrdd oedd hyn, oherwydd byddai canfyddiadau adroddiad WHESRi yn cael dylanwad mawr ar yr adolygiad arfaethedig o'r Strategaeth Hirdymor. Adleisiodd werthfawrogiad yr aelodau eraill o'r gwaith arloesol a llongyfarchodd bawb a fu'n gysylltiedig ar ran y Bwrdd.

Camau gweithredu: MB/MD

PHW 250/2021

Fframwaith Sicrwydd y Bwrdd

PHW 250.1/2021

Adroddiad y Prif Weithredwr

Dywedodd TC fod y sefydliad yn symud i'r cam adfer arfaethedig yn ofalus; byddai hyn yn gam pwyllog a fyddai'n cynnwys asesiad parhaus o'r gofynion COVID-19, ond y byddai staff yn dychwelyd i'w rolau allweddol, er mwyn cefnogi'r gwaith o ailysgogi swyddogaethau craidd. Aeth ymlaen i dynnu sylw at:

- Newidiadau i'r Tîm Gweithredol; diolchodd TC i AJ ac ED am eu harweinyddiaeth ar yr ymateb i COVID-19;
- Y gwaith yn ystod y tair blynedd ddiwethaf i baratoi ar gyfer y broses Pontio a Gadael yr Undeb Ewropeaidd (UE). Daeth y Rhaglen Waith i ben yn ffurfiol ar 31 Mawrth 2021 a darparodd yr [Adroddiad Cau Prosiect y Rhaglen Parodrwydd i Ymadael â'r UE](#) grynodeb o'r camau gweithredu a gyflawnwyd. Nododd AJ yr heriau wrth ddatblygu'r gwaith hwn yr un pryd â cham 2 y pandemig COVID-19, gan nodi'n gadarnhaol, fodd bynnag, y cydweithrediad cadarn ar draws y DU ar ôl gadael yr UE;
- Y cyfarfod ar 19 Mai 2021 gyda'r Bwrdd Cyngorau Iechyd Cymuned, gyda JW, i drafod cyfleoedd ar gyfer ffyrdd newydd o weithio; roedd hyn wedi bod yn gynhyrchiol a byddai ymgysylltiad pellach yn dilyn;
- Y cyfarfod cychwynnol diweddar gyda Dr Jenny Harries, Prif Weithredwr newydd Asiantaeth Diogelwch Iechyd y DU (UKHSA)

Nododd DE fod risgiau cynharach ynghylch gadael yr UE wedi canolbwyntio ar staff meddygol a recriwtio staff meddygol; holodd ynghylch y sefyllfa bresennol a'r trefniadau monitro parhaus sydd ar waith. Cadarnhaodd AJ y bwriad i reoli unrhyw risgiau parhaus ar lefel Cyfarwyddiaeth, ond nid oedd yn ymwybodol bod y risgiau a nodwyd gan DE yn parhau. Cytunodd i gadarnhau hyn y tu allan i'r cyfarfod.

Camau gweithredu: AJ

Nododd AJ hefyd y Memorandwm Cyd-ddealltwriaeth a oedd yn cynnwys Iechyd Cyhoeddus Cymru, Public Health England (PHE) a'r Ganolfan Ewropeaidd ar gyfer Rheoli Clefydau.

Holodd SG ynglŷn â chynnal perthnasau gwaith effeithiol gyda Lloegr, yn dilyn y newidiadau strwythurol sy'n cael eu gwneud yno. Cadarnhaodd TC y bwriad i barhau â'r trefniadau gwaith agos. Cytunodd i ddarparu gwybodaeth i'r Bwrdd wrth i'r cynigion ddatblygu.

Camau gweithredu: TC

Nododd y Bwrdd yr adroddiad a **chymryd sicrwydd** ohono, yn ogystal â'r trafodaethau.

PHW 250.2/2021 Adroddiad Integredig ar Berfformiad

Nododd HG fod y Dangosfwrdd Sicrwydd Perfformiad wedi bod ar waith ers blwyddyn bellach ac y byddai'n parhau i esblygu. Yna cyflwynodd yr adroddiad a gofynnodd i bob Swyddog amlygu unrhyw faterion penodol.

Y Gweithlu

Tynnodd NL sylw at: y sefyllfa sefydlog o ran salwch ac absenoldeb; y bwriad i ddefnyddio'r Dangosfwrdd Sicrwydd Perfformiad i hysbysu gwaith y Pwyllgor Datblygu Sefydliadol a Phobl; y cynlluniau i wella cyfraddau cwblhau ar gyfer Fy Nghyfraniad a sut y byddai hyn yn cydfynd â gwaith trawsnewidiol parhaus; y risgiau a nodwyd ynghylch cydymffurfiaeth hyfforddiant mewn cysylltiad â hyfforddiant codi a chario statudol a hyfforddiant cynnal bywyd sylfaenol. Roedd yr hyfforddiant a ohiriwyd ym mis Rhagfyr 2020 wedi achosi oedi ond rhoddodd NL sicrwydd i'r Bwrdd bod cynlluniau ar waith i aildechrau'r hyfforddiant gofynnol yn ystod yr Haf.

Camau gweithredu: NL

Cyllid

Nododd HG y byddai ffigurau diwedd y flwyddyn 2020/21 yn cael eu cwblhau ddiwedd mis Mai; bod strategaeth gyllid a gymeradwywyd gan y Bwrdd yn cael ei chymhwyso i gyllideb 2021/22; bod swyddi newydd wedi'u cynnwys fel rhan o'r dull sefydliadol tuag at adfer.

Diolchodd TC i HG, Angela Fisher a'r Tîm Cyllid cyfan am eu gwaith goruchwylio a rheoli trylwyr o sefyllfa ariannol Iechyd Cyhoeddus Cymru yn ystod cyfnod heriol iawn.

Y Cynllun Gweithredol

Atgoffodd HG y Bwrdd fod y Cynllun Gweithredol yn parhau i fod ar ei ffurf ddrafft, ac y byddai'r Bwrdd yn derbyn y fersiwn derfynol mewn cyfarfod ar 24 Mehefin 24, cyn ei chyflwyno i Lywodraeth Cymru ar ddiwedd y mis hwnnw. Nododd y Bwrdd y cyflawniadau hyd yma.

Ansawdd

Pwysleisiodd RB-W y bod y sefyllfa'n gwella o ran yr amser ymateb 30 diwrnod a'r gwelliannau pellach disgwylidig. Cadarnhaodd y byddai proses Rheoli Pryderon Unwaith i Gymru yn cael ei rhoi ar waith yn ddiweddarach yn 2021 a sicrhodd y Bwrdd ynghylch y cynlluniau sydd ar waith o ran parodrwydd sefydliadol ar gyfer y newid hwn ar lefel system.

Darparodd RB-W wybodaeth hefyd am y nifer o staff sydd wedi cael brechlynnau, a chadarnhaodd fod 86% o staff Iechyd Cyhoeddus Cymru wedi cael eu brechlyn cyntaf a bod 52% wedi cael yr ail un.

Sgrinio

Myfyriodd AJ ar effaith COVID-19 ar y mwyafrif o'r rhaglenni sgrinio; roedd pob un wedi ailddechrau erbyn hyn, a'r rhan fwyaf ohonynt yn dechrau lleihau'r ôl-groniadau. Roedd Sgrinio Llygaid Diabetig Cymru yn parhau i fod yn heriol a dywedodd y Byddai'r Pwyllgor Ansawdd, Diogelwch a Gwella yn derbyn adroddiad cryno yn y cyfarfod nesaf.

Fe wnaeth DC gydnabod yr heriau yn sgil ailddechrau Sgrinio Llygaid Diabetig Cymru, sef rhaglen sgrinio fwyaf Iechyd Cyhoeddus Cymru. Gofynnodd am ddiweddiariad ar waith sy'n mynd rhagddo i nodi lleoliadau priodol er mwyn cyflymu'r broses ailddechrau. Cadarnhaodd AJ fod dull wedi'i haenu'n ymwneud â risgiau wedi'i fabwysiadu, a bod nodi lleoliadau priodol o fewn y dull hwn yn parhau i fod yn her am ddau brif reswm (i) roedd y cyfyngiadau COVID-19 wedi lleihau'r nifer a allai fynychu pob sesiwn a (ii) lleihad yn nifer y lleoliadau addas. Roedd lleoliadau eraill yn cael eu hystyried, gan gynnwys prifysgolion, cyfleusterau chwaraeon ac eiddo Cyngor y Celfyddydau. Cadarnhaodd TC ei bod wedi cwrdd â chydweithwyr llywodraeth leol i ystyried y posibilrwydd o ddefnyddio eu lleoliadau hwy.

Dywedodd HG, wrth i'r broses o ailddechrau'r rhaglenni barhau i fod yn ffocws pwysig, roedd y Dangosfwrdd Sicrwydd Perfformiad yn asesu parodrwydd i ailddechrau yn ogystal â'r gweithgarwch ei hun.

Diolchodd JW i bawb am eu diweddariadau; dywedodd wrth yr arsylwyr yn y cyfarfod fod y Dangosfwrdd yn offeryn rheoli dynamig, a'i fod yn cael ei ddefnyddio'n ddyddiol.

Nododd y Bwrdd yr holl faterion a godwyd, a **chymryd sicrwydd** o'r Adroddiad a'r diweddariadau llafar a ddarparwyd.

PHW 250.3/2021 Diweddariad Cyffredinol ar y Coronafeirws Newydd (COVID-19)

Rhoddodd AJ y diweddariad canlynol:

- Roedd y data diweddaraf yn dangos bod nifer yr achosion o COVID-19 yng Nghymru yn parhau i fod yn isel a sefydlog, gyda chyfradd achosion 7 niwrnod o 8-9 (ystod o 2-20). Roedd y gyfradd gadarnhaol yn 1% ar hyn o bryd, gyda thua 50 o achosion newydd y dydd. Roedd clystyrau yn parhau i fod yn amlwg ar lefel leol ond nid oedd unrhyw lefelau brig ers canol mis Mai; roedd y clystyrau yn canolbwyntio mwy ar sefydliadau meithrin ac addysgol yn awr, gyda'r niferoedd mewn cartrefi gofal yn lleihau. Nid adroddwyd am unrhyw farwolaethau am sawl diwrnod ac mae'r cyfraddau derbyniadau i'r ysbyty yn parhau i fod yn isel.
- O ran rhaglen frechu COVID, rhoddodd AJ wybodaeth am weinyddu 3.1 miliwn (2.1 miliwn o ddosau cyntaf (83%) ac 1 filiwn o ail ddosau (40%)). Mae pobl ifanc 18-29 yn gallu cael y brechlyn yn awr a soniodd AJ am lwyddiant y brechlyn o ran atal marwolaethau y gellir eu hosgoi. Roedd gwaith penodol yn parhau i gynyddu'r nifer a oedd yn cael y brechlyn mewn ardaloedd lle bu'r nifer yn isel.
- Amrywiolyn Caint yw'r prif Amrywiolyn o Bryder yng Nghymru o hyd. Roedd pob un o'r Amrywiolion hyn yn cael eu monitro ac adroddir arnynt yn wythnosol; roedd y nifer o amrywiolion yn parhau yn sefydlog, ac ni fu unrhyw gynnydd yn amrywiolyn De Affrica, ond adroddwyd cynnydd yn Amrywiolyn India, gyda'r olaf yn cael ei ddatgan yn Amrywiolyn o Bryder ym mis Mai 2021. Nifer yr achosion o'r Amrywiolyn India yng Nghymru oedd 57 ac roedd y mwyafrif o'r rhain yn gysylltiedig â theithio. Mae timau'n parhau i ymchwilio i achosion a chlystyrau.

Diolchodd JW i AJ am ei adroddiad manwl ac estynnodd wahoddiad i aelodau holi cwestiynau:

Gofynnodd DE am wybodaeth bellach am y cyfraddau a oedd yn manteisio ar y brechlyn ar draws gwahanol gymunedau yng Nghymru. Rhoddodd JW sylwadau ar Adroddiad 4 Gwyliadwriaeth Fanylach ar y brechlyn COVID-19 - [Wales COVID-19 vaccination enhanced surveillance - equality report.pdf](#)

Croesawodd SG y diweddariad a holodd AJ a oedd unrhyw dystiolaeth o amharodrwydd i dderbyn y brechlyn ymhlith y grwpiau oedran iau y

cysylltir â hwy yn awr. Cadarnhaodd AJ nad oedd unrhyw dystiolaeth o hyn hyd yma, a bod gwaith monitro trylwyr yn parhau.

Diolchodd JW ar ran y Bwrdd i AJ ac ED am eu cyfraniad sylweddol i'r gwaith o reoli COVID-19 yng Nghymru ac am eu hadroddiadau gwybodaeth ym mhob un o gyfarfodydd y Bwrdd.

Nododd y Bwrdd gynnwys y diweddariad a **chymryd sicrwydd** o'r trafodaethau.

PHW 250.4/2021 Adroddiadau Blynyddol Pwyllgorau'r Bwrdd 2020/21

Diolchodd JW i KE, DE, HG, RB-W ac AJ, yn ogystal ag aelodau'r Pwyllgor am y gwaith caled yr oedd pob Pwyllgor wedi'i wneud ar ran y Bwrdd llawn yn ystod blwyddyn eithriadol o heriol. Atgoffodd y cyfarfod fod dau Bwyllgor wedi cyfarfod yn fwy aml yn ystod COVID-19 a bod pob un wedi rheoli agenda sylweddol. Roedd eu gwaith a'u ffocws wedi bod yn amhrisiadwy ac roedd y ddau adroddiad diwedd y flwyddyn yn dyst i bwysigrwydd eu cyfraniadau.

Y Pwyllgor Archwilio a Llywodraethu Corfforaethol (ACGC)

Wrth gyflwyno Adroddiad Blynyddol y Pwyllgor Archwilio a Llywodraethu Corfforaethol 2020/21, tynnodd DE sylw at y materion canlynol:

- Y cyfarfodydd ychwanegol yn ystod 2020/21 a'r budd o gael aelodaeth estynedig. Diolchodd DE i aelodau'r Pwyllgor, HG a'r staff cymorth am eu hymrwymiad parhaus i gyflawni rhaglen waith y Pwyllgor yn ystod y flwyddyn ddiwethaf.
- Sgorau asesu 'sylweddol' neu 'resymol' yr adroddiadau archwilio, a oedd yn adlewyrchu ymrwymiad y sefydliad i berfformiad uchel.
- Y bwriad i graffu ar elfennau ariannol y Dangosfwrdd Sicrwydd Perfformiad er mwyn rhoi sicrwydd pellach i'r Bwrdd ar y mater hwn.

Y Pwyllgor Ansawdd, Diogelwch a Gwella (QSIC)

Nododd KE rôl y Pwyllgor yn cefnogi'r Bwrdd ynghylch ansawdd yr ymateb diogelu iechyd. Fel gyda'r ACGC, roedd y Pwyllgor Ansawdd, Diogelwch a Gwella wedi cwrdd yn fwy aml yn ystod 2020/21 a hefyd wedi elwa ar gynnydd yn yr aelodaeth i sicrhau lefel briodol o oruchwyliaeth a chraffu. Tynnodd sylw at y pwyntiau canlynol:

- Dangosodd yr adroddiad ystod y gwaith i'w ystyried, gyda rôl benodol yn craffu ar ohirio ac ailddechrau rhaglenni sgrinio.
- Meysydd ffocws eraill: ansawdd y wybodaeth; goruchwyllo'r broses Gweithio i Wella; yr ymateb diogelu iechyd o safbwynt ansawdd a diogelwch, gan gynnwys ymarferion 'craffu manwl' ar ficrobioleg.

- Yr heriau o sicrhau mewnbwn priodol gan ddefnyddwyr gwasanaethau yn ystod y pandemig COVID-19; byddai'r Pwyllgor Archwilio a Llywodraethu Corfforaethol yn parhau i ganolbwyntio ar ymgysylltu.
- Nid oedd unrhyw faterion eraill o bryder i'w cyflwyno i'r Bwrdd.

Ystyriodd y Bwrdd yr Adroddiadau Blynyddol a dderbyniwyd gan y ddau Bwyllgor a **chymryd sicrwydd** o'r Adroddiadau a'r drafodaeth.

PHW 250.5/2021 Pwyllgorau'r Bwrdd: Adroddiad gan Gadeiryddion y Pwyllgorau

Wrth gyflwyno'r eitem hon ar yr agenda, dywedodd JE fod tri o'r pedwar Pwyllgor lefel Bwrdd yn weithredol yn awr, a bod y Pwyllgor Datblygu Sefydliadol a Phobl (POD) wedi ymuno ag ARAC a QSIC. Er budd y rhai a oedd yn arsylwi'r cyfarfod, esboniodd JW fod yr eitem hon ar yr agenda yn rhoi cyfle i gadeiryddion y Pwyllgorau dynnu sylw'r Bwrdd llawn at unrhyw faterion penodol.

QSIC

Dywedodd KE fod Adroddiad Blynyddol QSIC yn rhoi diweddariad llawn, ac nad oedd unrhyw faterion ychwanegol i'w hadrodd.

ACGC

Dywedodd DE fod ACGC yn ei gyfarfod ar 5 Mai wedi ystyried adroddiad llywodraethu gwybodaeth, ond na fu'n bosibl canfod datrysiad ar unwaith i rai cwestiynau; pwysleisiodd bwysigrwydd amseriad cyflwyno adroddiadau i Bwyllgorau, er mwyn gallu rhoi ystyriaeth ymlaen llaw i'r materion a godwyd.

Camau gweithredu: HB

Datblygu Sefydliadol a Phobl (POD)

Gwnaeth MM sylwadau ar gyfarfod cyntaf POD ers iddo aildddechrau, a bod y trafodaethau wedi cynnwys: Cylch Gorchwyl a dulliau gweithredu; nifer y staff a oedd wedi manteisio ar y brechiad COVID-19; recriwtio; ymgysylltu â staff; a fframwaith rheoli perfformiad y gweithlu. Nododd hefyd fod y Pwyllgor yn cydnabod yr angen i alinio ei raglen waith, ac i ymgysylltu'n briodol â Phwyllgorau eraill y Bwrdd.

Nododd y Pwyllgor y diweddariadau a ddarparwyd, a chroesawu'r ffaith bod y Pwyllgor POD wedi aildddechrau a **chymryd sicrwydd** o'r gwaith sy'n mynd rhagddo.

PHW 251/2021 Eitemau i'w Cymeradwyo

PHW 251.1/2021 Y Strategaeth Ansawdd a Gwella

Wrth gyflwyno'r eitem hon ar yr Agenda, atgoffodd RBW y Bwrdd fod y Strategaeth Ansawdd a Gwella (Y Strategaeth) yn adeiladu ar y

Fframwaith Ansawdd ac Effaith a ddatblygwyd yn 2019; bod angen canolbwyntio o'r newydd ar y ffaith bod yr ymateb i COVID-19 wedi achosi rhywfaint o oedi, ond roedd yn falch o gyflwyno'r Strategaeth i'r Bwrdd; byddai hyn yn hwyluso'r gwaith o ymgorffori gwelliannau yn systematig ar draws y sefydliad a chynorthwyo'r Bwrdd i gyflawni ei rôl a'i gyfrifoldebau.

Y dyddiad deddfu arfaethedig ar gyfer *Deddf Iechyd a Gofal Cymdeithasol (Ansawdd ac Ymgysylltu) (Cymru) 2020* oedd Ebrill 2023; roedd y Ddyletswydd Ansawdd yn ofyniad deddfwriaethol ac, yn ogystal â sicrhau cydymffurfiaeth, byddai angen symud i system rheoli ansawdd ar draws y sefydliad cyfan. Roedd gwaith ar Gynllun Gweithredu'n mynd rhagddo, ond roedd yr angen am fuddsoddiad ychwanegol yn amlwg.

Diolchodd JW i RB-W am ei chrynodeb defnyddiol o'r cefndir gan wahodd cwestiynau neu sylwadau.

- Roedd MM yn croesawu'r dull gweithredu a gyflwynir yn y Strategaeth. Cwestiynodd y ffaith fod yr asesiad o allu sefydliadol i wneud gwelliannau presennol ar lefel 1, o ystyried y gwaith gwella sy'n mynd rhagddo ar draws y sefydliad a'r ymrwymiad i ddiwylliant gwella. Roedd hefyd yn cefnogi dull integredig, er mwyn gwneud y defnydd gorau o adnoddau.

Gofynnodd JW i KE a hoffai wneud sylw. Cadarnhaodd, wrth ystyried y Strategaeth ar ei ffurf drafft, fod QSIC wedi dod i'r casgliad bod lefel 1 yn briodol oherwydd: gorddibyniaeth ar Gwelliant Cymru fel ffocws o ran y lefel uchaf o weithgarwch gwella; y diffyg dull gweithredu cyson o ran gweithgarwch gwella ar draws y sefydliad cyfan; yr angen i ymgorffori arweinyddiaeth systemau er mwyn cefnogi hyn.

- Nododd JB fod *Adolygiadau o Ansawdd Gofal Iechyd y Sefydliad ar gyfer Cydweithrediad a Datblygiad Economaidd: y Deyrnas Unedig (2016)* wedi nodi'r cyfleoedd ar gyfer mwy o arloesedd yng Nghymru ac roedd hyn yn parhau i fod yn wir. Roedd Iechyd Cyhoeddus Cymru yn annodweddiadol am nad oedd ganddo Hyb Gwella Ansawdd a phwysleisiodd JB bod hwn yn ofyniad yr oedd angen ei fodloni ar fyrder, yn ogystal ag atgyfnerthu'r capasiti a'r gallu mewnol.

Roedd TC yn cefnogi'r angen am Hyb Gwella Ansawdd; roedd y ffocws ar COVID-19 wedi atal cynnydd hyn ar gam cynharach. Roedd yn cytuno â MM o ran yr angen i ymgorffori arloesedd ar draws y sefydliad, gan ddefnyddio methodoleg unigol; byddai hyn yn helpu i hysbysu ac atgyfnerthu'r Strategaeth Hirdymor ar gyfer y sefydliad.

Nododd JW werth hollbwysig gweithgarwch gwella ar draws y sefydliad yn ystod y flwyddyn ddiwethaf a mynegodd werthfawrogiad y Bwrdd o'r gwaith dan sylw. Roedd y camau nesaf yn ymwneud â systemeiddio'r dull gweithredu, fel y trafodwyd, a holodd ynghylch cyllido'r Hyb Gwella Ansawdd arfaethedig. Dywedodd HG y byddai'r Cynllun Gweithredol terfynol yn cynnwys yr holl gynigion buddsoddi yn ystod y flwyddyn. Cadarnhaodd RBW y byddai QSIC yn derbyn y Cynllun Gweithredu ar gyfer Blwyddyn 1 a chytunodd i gynnal trafodaethau ar yr Hyb Gwella Ansawdd y tu allan i'r cyfarfod.

Camau gweithredu: RB-W

Derbyniodd a chymeradwyodd y Bwrdd y Strategaeth Gwella Ansawdd, gan nodi'r bwriad i'w adolygu eto ar ddiwedd blwyddyn 1.

PHW 251.2/2021 Cytundeb Lletya yr Uned Cyflawni Ariannol

Dywedodd HG fod Iechyd Cyhoeddus Cymru yn cefnogi ac yn cynnal nifer o swyddogaethau cenedlaethol, a bod yr Uned Cyflawni Ariannol yn un swyddogaeth o'r fath. Roedd trefniadau'n destun adolygiad ac roedd y papur yn gofyn am gymeradwyaeth y Bwrdd am gyfnod o dair blynedd, hyd at 2024. Nododd HG fod y Cytundeb Lletya yn cynnwys ehangu cylch gwaith y rôl ond cadarnhaodd na fyddai hyn yn effeithio ar y trefniant cynnal.

Cymeradwyodd y Bwrdd yr estyniad i'r Cytundeb Lletya hyd at 2024.

PHW 251.3/2021 Adolygiad o'r Rheolau Sefydlog

Nododd HB fod y papur i gefnogi'r eitem hon ar yr Agenda yn cynnwys crynodeb llawn o'r newidiadau arfaethedig i'r Rheolau Sefydlog. Nid oedd unrhyw newidiadau perthnasol i'w cyflwyno i'r Bwrdd.

Wrth wneud sylwadau ar y Rheolau Sefydlog cyfeiriodd JW at y ffaith y gallai unigolion gynnal aelodaeth anweithredol ar yr amod eu bod yn aelodau ar un corff y GIG yn unig ar y tro. Roedd KE yn gadeirydd Pwyllgor Gwasanaethau Iechyd Arbenigol Cymru, cydbwyllgor o'r saith Bwrdd Iechyd. Nid oedd hyn yn endid cyfreithiol ynddo'i hun ac felly, nid oedd darpariaethau'r Rheol Sefydlog yn berthnasol.

Cytunodd y Bwrdd i **gymeradwyo, mabwysiadu ac ymgorffori'r** Rheolau Sefydlog Enghreifftiol.

PHW 251.4/2021 Adolygiad o'r Cyfarwyddiadau Ariannol Sefydlog

Cadarnhaodd HG, yn yr un modd â Rheolau Sefydlog, fod Cyfarwyddiadau Ariannol Sefydlog hefyd yn destun adolygiadau

rheolaidd ar draws GIG Cymru; nid oedd ganddo unrhyw newidiadau perthnasol i'w cyflwyno i'r Bwrdd.

Cytunodd y Bwrdd i **gymeradwyo, ymgorffori a mabwysiadu'r** adolygiad diweddaraf o'r Cyfarwyddiadau Ariannol Sefydlog Enghreifftiol.

PHW 251.5/2021 Yr Adolygiad Blynyddol o Gylch Gorchwyl y Pwyllgor

Atgoffodd HB y Bwrdd fod Cylch Gorchwyl holl Bwyllgorau'r Bwrdd yn destun adolygiad blynyddol; roedd y papur hwn yn ymwneud â'r adolygiadau o ARAC, QSIC a'r Pwyllgor Tâl a Thelerau Gwasanaeth.

Nododd a chymeradwyodd y Bwrdd yr adolygiadau.

PHW 251.6/2021 Protocol – Rheoli Papurau'r Bwrdd

Ailbwysleisiodd JW ymrwymiad y Bwrdd i weithredu mewn ffordd mor dryloyw, agored ac atebol â phosibl; roedd yn cydnabod bod adegau pan fu'n rhaid i'r Bwrdd symud i sesiwn breifat a bod y Protocol yn nodi'r rhesymau dros hyn. Byddai holl gyfarfodydd preifat y Bwrdd yn cynnwys y rhesymeg berthnasol a chynigiodd JW i amserlennu'r rhain yn flynyddol, at ddibenion myfyrio ac adolygu.

Cymeradwyodd y Bwrdd y Protocol, a chafodd adolygiad blynyddol ei gynnwys at ddibenion myfyrio ac adolygu.

Camau gweithredu: HB

PHW 251.7/2021 Cadarnhau Camau Gweithredu'r Cadeirydd a Gosod y Sêl Gyffredin

Nododd JW fod y Gorchmynion Sefydlog yn darparu ar gyfer camau gweithredu'r Cadeirydd, yn ôl yr angen; byddai ond yn defnyddio'r ddarpariaeth hon pe byddai gwir angen a chyda chefnogaeth o leiaf ddau Gyfarwyddwr Anweithredol. Gofynnodd JW i'r Bwrdd gadarnhau'r ddau gam gweithredu a gymerwyd ers cyfarfod diwethaf y Bwrdd.

Nododd y bwrdd ddau Gam Gweithredu'r Cadeirydd, **derbyniwyd sicrwydd** bod y rhain yn cyd-fynd â darpariaethau Rheolau Sefydlog Adran 2 a **chadarnhawyd** y camau gweithredu.

PHW 251.8/2021 Cofnodion a'r Cofnod o Gamau Gweithredu o Gyfarfod y Bwrdd ar 25.03.21

Cymeradwyodd y Bwrdd gofnodion y cyfarfod a gynhaliwyd ar 25.03.21 fel cofnod gwir a chywir.

Nododd y Bwrdd y Cofnod o Gamau Gweithredu a'r ddau gam gweithredu a oedd yn parhau ar agor.

PHW 252/2021 Eitemau i'w Nodi

Nid oedd unrhyw eitemau i'w nodi.

Cyn cau'r cyfarfod, dywedodd JW fod tri aelod o'r Bwrdd yn gadael eu rolau presennol.

Roedd JA yn gadael Iechyd Cyhoeddus Cymru i ymgymryd â rôl newydd fel Cyfarwyddwr Iechyd Cyhoeddus yn Swydd Gaergrawnt a Peterborough. Ar ran y Bwrdd, estynnodd JW ei llongyfarchiadau i JA ar ei phenodiad newydd a diolchodd yn fawr iddi am ei chyfraniad sylweddol i waith Iechyd Cyhoeddus Cymru ers ymuno yn 2017; roedd hyn yn cynnwys ei rôl arwain allweddol wrth gyflwyno *Creu Cymru Iachach* a sicrhau perthynas effeithiol a phriodol gyda phob rhanddeiliad, gan gynnwys Cyfarwyddwyr Iechyd Cyhoeddus, ar draws Cymru gyfan. Ymunodd y Bwrdd â JW i ddymuno'n dda i JA ar gyfer y dyfodol a phob llwyddiant iddi yn ei rôl newydd.

Dywedodd JW hefyd bod AJ ac ED yn dychwelyd i'w swyddi parhaol wedi' i'w swyddi dros dro ddod i ben. Roedd y ddau wedi cyflawni hyn gyda rhagoriaeth ac mae'r Bwrdd wedi elwa'n fawr ar eu harbenigedd o'u pynciau a'u sgiliau arweinyddiaeth gorfforaethol. Mae Iechyd Cyhoeddus Cymru wedi bod yn ffodus iawn o'u cael ymhlith eu cnewyllyn o uwch arweinwyr ac ymunodd y Bwrdd â JW i ddiolch o galon i AJ ac ED am eu gwaith.

PHW 253/2021 Dyddiad Cyfarfod Ffurfiol Nesaf y Bwrdd

Trefnwyd y cyfarfod nesaf ar gyfer 29 Gorffennaf 2021.

PHW 254/2021 Diwedd y Cyfarfod Cyhoeddus

Daeth y cyfarfod i ben am 12.30pm